



崑山雜詠卷第八

題詠

題縣圃蘊輝亭

周承勛


承勛字希櫻邑令

瓦礫頻年積鋤耰十輩功旋移低地碧頗雜亞
枝紅對酒逢寒食憑欄接暖風墻慳天自濶堪
送北飛鴻

簿舍西堂

奚商衡

麓官到眼唯朱墨箇裏清虛却可人曉徑忽聞



花信早晚窓時對月痕新客來但恠堦庭寂畫
求偏於枕簟親莫莫只求閒裏過抗顏何苦拜
車塵

讀書堂

葉自彊建於縣齋內永樂
初芮翀重建改名清心

葉子強

讀書不策勲歲月忽已晚隨此塵埽網吾行其
既遠胡寧於書事意愛猶繾綣况之迷蹊人慕
顧祗舊阪扁旁真赤幟所立示所本又如農人
心終不置糲菘晞髮茅簷下榮榮蘭九畹初服
苟未替無亦驚婉婉所逢非所安吾廬盍云返

娟娟百箇竹落落一丈松豈無桃李花春事孰
與冬寒菊北戶下不鬪顏色穠氣味如禿翁忍
死無容容一云忍死
不無容霜風落落繫鴈露草棲織蛩
讀書真可人明星耿踈蓬

小山後叢桂方池前止水泠然堂中人枯槁祗
中爾平生不止酒來此真止矣今辰忽開尊叵
料真未止餅壘本非二無罄亦無耻卷尊佩君
言慕之戴星起

左角明西方十分農事回鞭蒲正爾束繫固夷
然開我胡汝乎德一朝變喧豗仁義不蹂踐肺

肝自胚胎再拜父老言美意吾所該詩書不得力亦自書中來

少長事壯厲意氣彌九州鞭車踏長路渠料能夷猶因此九折坂嶮崎不容輟彼須非所彊此售寧或求從吾讀書心大寒索衣裘賤嗜匪貴獻一拂銷百愁寶此清淨退相從賦歸休農圃雅所問同一壑一丘

家西小亭名水雲千頃

姚申之

雲影翻隨宿鴈迴斜暉猶帶晚潮來小橋低處

通船過一隊鷺兒兩道開

范公亭

亭在薦巖寺後圃池上范成大少讀書寺中嘗游息于此吳仁傑扁之曰可賦後人更以范公名之今尚存在都憲院內

秦約

范公山中讀書處雲氣亭亭如蓋遮連岡白石或化玉匝地紫藤多着花要知奉使盡忠讜豈但賜恩為寵嘉野人生晚不竝世獨倚涼飈增歎嗟

秦鳳

鳳刑部郎中

范公好學古稱賢我到斯亭憶往年千丈紫藤

花爛熳清芬留與後人傳

次韻

董和

和戶部知事

瀟灑曾聞寓昔賢吾伊絕響已多年
藤蘿蔓翠溪流淨風景渾疑畫裏傳

張徽

徽郡同知

不是叢林老衲賢肯延儒碩坐窮年
皇華使者重題品贏得高風萬里傳

夏元吉

偶上范公亭亭幽景物清竹添今歲
笋樹掛昔

時藤老蠹隨人化孤禽向客鳴欄傾
不能倚惆悵下堦行

瞿惠夫南園

惠夫名智其先嘉定人父晟始遷崑山性嗜學善論然未

嘗談人過家貧欣欣如也

秦約

古鐵塘西博士家高軒瞰水築新沙
階頭雨長青裳草合歡草名池裏風
搖白羽花丹頰老人馴野鹿斑衣
穉子弄慈鴉未應北郭田二頃更
置南樓書五車

顧處士竹逸亭

于立

立字彥成廬陵人匡廬山道士

徵君結屋玉山裏
個個修篁一尺圍
秋聲六月起蕭瑟
翠雨盡日生霏微
僊人或送青精飯
道士時來白羽衣
清觴雅瑟在盤石
坐看白雲天際飛

靜寄軒詩

倪瓚

瓚字元鎮號雲林生常州無錫人性寡合好潔能詩善畫其小景林木平遠有奇致家饒貲財遭元末兵亂悉分財生平所厚友生乃往來五湖三泖間人望之若神仙云

靜寄軒中無垢氛
研苔滋墨氣如雲
匣藏數鈕

秦朝印白玉蟠螭小篆文

獨行應如魯獨居
心同柳下孰云迂
從教鄰女衣露濕
試問高人安穩無

身似梅花樹下僧
茶煙輕颺鬢髻神
清又似孤山鶴瘦
骨伶仃絕愛憎

題顧仲淵棲雲軒

于立

玉峯連天向天起
秀色盤桓三十里
寒翠淋漓濕窓几
影落明湖一泓水
明湖之水清無底
幽人結屋湖光裏
谿南谿北花陣迷
舍東舍西山

鳥啼夜來東風雨一犁滿川煙霧春雲低春雲
無心無定據長在幽人讀書處未肯從龍行雨
去牕前且伴幽人住

顧仲瑛和

春雲壓簾飛不起煖氣籠葱百餘里桃花亭亭
笑酣春谿邊浣花染谿水武陵才人碧牕底青
霓衣裳白霞裏翠煙點染猩猩毛冰綃凝文露
華洗山光入眼青青迷小鳥向人啼復啼前村
後村樹如蓋柳花起舞迴風低雲師雨師浩無
據驅雲勞勞向何處請君勸師一杯酒更借白

雲檐下住

題崑山王氏桐月軒

易桓

月出軒更幽照我青瑤林流光淹夕景疏碧散
秋陰朝陽豈無鳳夜坐空有吟之人金閨秀斯
桐清廟音賞靜愜真境覽芳怡素心何當候鳧
鳥遲子玉山岑

題崑山李氏瀨芳閣

雅構逼闌闈而無流俗情汲井玉泉冷開牕蘭
雪明韞真屏麤穢含英抱芳馨冲襟愜幽賞華

池有餘清

拙齋為盧長嬰賦

太樸日已散巧偽日已滋舉世事彫琢樸散何時歸美玉抱貞素琢喪良可卑嗟哉智力盡徒巧將安施所以巧若拙遺言豈吾欺鹿城有佳士被褐類無為讀書三十載一拙恒自持呼兒具杯酌邀我賦拙詩我亦抱甕人日日灌荒畦機心素已息庶有同襟期剪彼園中韭酌彼花下卮共醉北牕下夢到羲皇時

題顧善夫墨妙亭

善夫名信自崇明徙崑山之太倉大德初為浙

江軍器提舉好古博雅從趙文敏公游構此亭以藏文敏墨妙自號樂善處士嘉靖初江南陶氏穿池得所瘞碑刻二十餘片人爭搨之今漸剝蝕矣

衛培

宋末事性理書法悉廢置况復攻程文視此等末技豈知古小學書廼在六藝此語非我出得自松雪公松雪學鍾王東南多從風遂令茹筆者馮陸交稱雄善夫愛清賞十襲護真蹟一字弗棄捐得即壽之石要令千載人摩挲同岱嶧為石構斯亭亭以墨妙名衆帖盡道勁盤谷尤

晶熒惜無儋耳翁作詩落其成我欲卧碑下朝
暮究點畫其次攻程文最上窮理學竊語君勿
嗤那有揚州鶴

來鶴亭

呂誠嘗畜一鶴有一鶴自來為侶遂構亭名曰來鶴

張雨

雨字伯雨服道茅山號句曲外史又號貞居工詩一時名士若楊維

禎倪瓚顧輝輩咸與為方外交嘗從王溪月真人入京時吳閑閑宗師全節為嗣師喜其才送翰林集賢表學士伯長謝博士敬德馬御史伯庸吳助教養浩虞修撰集相與來姓名益大著

華表歸來舊令威曉風將夢上天飛
緱山借與浮丘伯一曲瑤笙月下歸

來鶴亭即席賦

草堂孤鶴駐樊籠忽有鸞笙下碧空
待喚羽衣相向舞呂家園裏看春風

和張伯雨來鶴亭夜坐

呂誠

草閣中宵清泠泠蒼筤四壁影踈踈
天頭雲過多於鴈池裏星移或似魚

玉立亭

楊維禎

王郎崑之秀玉立而長身亭子如笠大不直一

欠伸亭前千尺峯倒景入座濱燒琴有爨桐漉
酒有烏巾客來塞屋破露坐草上茵時時來鐵
叟共酌羅浮春

放鶴亭爲顧仲瑛賦

袁華

一鶴寥寥度碧空朝辭華表暮遼東託身每遇
雲林外啄食時鳴草澤中毛骨久知神所化壽
齡還與世相終曾觀夜舞瑤臺月兩翅翩颺八
極風

書聲齋爲野航老人賦

楊維禎

野航老人老學經擁鼻尚作伊吾聲彈琴間以
金石奏破屋不知風雨生古文漉簡千年在太
乙青藜五夜明可是流傳洛生詠朝陽遲子鳳
凰鳴

鹿城隱居

在縣西南

倪瓚

盧公武甫當世衰道卷之際獨能學
行偉然不但賢於流俗而遂已不愠
人之不知嗜古金石刻辭汲汲若饑

渴隱居婁江之鹿城澹泊無所營若
將終其身焉命余賦鹿城隱居因賦
避俗龐公隱鹿門鹿城靜亦絕塵喧釣綠水北
菰蒲渚牕俯江南桑柘村書蠹字殘繡汗簡石
魚銘古刻窪尊地偏舟楫稀來往獨有煙潮到
岸痕

袁華

崑山踈雨霽滄洲新水生氣清風日佳草木欣
敷榮維時春意動布穀催晨興帶經隴上鋤負
耒壟下耕釋耕應明詔出牧鄒魯氓鄒魯聖人
里政教庶易行遙瞻古鹿城白雲還英英他時
畫錦歸重叙漁樵盟

陳潛夫

潛夫字振祖自錢塘徙家崑山
有文行洪武六年為縣學訓導

轉國子學正游其門者多成
偉器所著述多散軼不傳

隱顯蹟固殊幽賞本同趣披圖見家山識我箴
修處悠悠崑阜雲離離鹿城樹牛耕春雨餘野
綠照庭戶牧民知稼穡自足了官務亦有南飛
鴻含情寄毫素

陶虞

天馬飾金勒和鑿振玲瓏其如渥洼道奮迅逐

追風榮遇匪不特任性異厥中盧侯崑山玉談
笑入南宮出守姬魯邦正聲搖星虹春明岱岳
秀行旆拂層峯緬懷鹿城居應門候兒童桑田
白日靜梓里新陰重何當返初服玄默抱淵冲
此志良已矣白楊森青穹

顧祿

祿字謹中華亭人永樂中與盧公武同在制誥司以詞翰著名

洪武八年冬余與公武舍人同在制
誥司屢聞談及崑山故居之勝今已
廿餘載矣適其長嗣來為武康貳令
詢及公武仙去既久偶出此卷索詩

因追舊事以寓感慨云

舍人長詫舊湖田政近崑山紫翠前未耜曉耕
黃犢雨釣絲晴颺白鷗天憶陪簪筆趨三殿每
念遺棺瘞九泉今在吳興題畫卷喜逢英嗣話
當年

王行

行字止仲吳縣人家素貧賤行數

藥千品無所遺忘媪喜以家嘗所儲

書與行行讀之二年所遂去授徒名

聲一時藉甚洪武初聘為郡學訓導

太守魏觀王觀並以行名上聞不報

鹿城嘉遁日有此讀書堂庭樹看餘蔭
想

後遊金陵客貴臣
王家坐玉事抵死

舊香墨莊籤帙古筆冢歲年長為喜蘭蓀在春
風擬繼芳

朱吉

鹿城近在玉峯前翠竹扶疎屋數椽考古窮年
書有蠹謀生樂歲郭無田披圖追憶曾遊處餘
澤今看後代賢焉得素琴彈素志柴門靜對月
娟娟

盧儒

儒字為已號重齋崑山人博學工
文善筆札天順初為中書舍人嘗
在翰林一日上命為雪賦甚急諸
公未能即就儒援筆而成一時共為
驚歎然其
文多不傳

鹿城緬幽閒崑丘遙聳峭靈境邁竒觀眷茲諧
夙好築室栖高情開牕豁吟抱春堤映桃柳秋
渚沿蒲蓼綠野耦農耕清川伴漁釣事從屏蹟
靜心協翫物妙四思悼張衡五悲惻盧照太璞
貴不凋淳德在弗曜邈矣玉巖居冥交與同調

崑山雜詠卷第八

崑山雜詠卷第九

題詠

期願堂 并序

龔明之

余自顧頽齡行將滿百雖日薄西山
亦當優游以卒歲遂課晁輩作期願
堂於野墅栽花種竹以為佚老之地
因賦詩四章以落之

投老歸來萬事休
北牕一枕足清幽
雖然不得行
曾臆
幸喜身無千歲憂

少年已自樂杯觴種秫安排老醉鄉試問幾回
供酒事真成三萬六千場

百事如今與世違一花一木謾兒嬉莫欺兀兀
癡頑老曾覩昇平元祐時

不服丹砂不如芝老來四體未全衰有人問我
期願法一味胃中愛坦夷

編蒲軒爲顏悅堂禪師賦

楊維禎

至正戊子春僕與京兆姚子章吳郡
顧仲瑛遊崑山明日悅堂招余讌賓

玉堂悅堂聰明識理奉親之行尤卓
旣題其養親圖卷臨行又書此詩于
養親編蒲之所

因尋老范讀書處知有前朝指柏僧黛葉寒垂
千尺檜紫花春着萬年藤摩尼珠明照神鉢琉
璃椀薄涵青鐙編蒲老子我所敬空王門中之
閔曾

蒼菴堂題詩遺明海大師

大師新安寺尼也永嘉西礪之弟子
傳法空王之外能吟七字句詩僕與

王山人遊崑山明海招茶供侍者無
有出楮求詩爲賦是作

解馬來登翠微閣揚舫重過寶禪林鉢衣五夜
下天女廣樂六時聞海音白金花開蔭葡萄樹青
雨子落娑婆陰新安上人尚文采能作石泉西
澗吟

素室爲聞次安賦

盛或

維次安父索居遁世好學孜孜素行其志思昔
聖賢窮達知命陋巷一瓢後車千乘伊進與退

道無不存匪慕乎外廼慎厥身味茲聖賢勗我
後人環堵之室左圖右書濯纓流水觀雲太虛
彼君子兮其樂弗渝

來龜軒歌

昔日避地商溪頭畏塗風雪同放舟登樓見月
思鄉淚坐石觀雲憶弟愁落花芳草青春暮歸
時喜踏來時路入門梧竹兩青青園池樹石還
如故中庭有物狀若能負屨踞石龕生苔相驚
左顧一笑粲乃是河伯使者清江來重門扃鑰
嚴且密曳尾泥塗何處入固知異物神所登卻

勝魚在網中得吾聞靈龜壽綿綿搢牀一息二
千年從游鳳麀郊藪外會合龍虎風雲前舉目
烽煙遍區宇巷陌銅駝委榛莽玉山佳處屋鱗
鱗鶯花春滿辛夷塢道人當軒寫來龜邀我爲
作來龜詩蹇余才薄不能賦願爾子孫金印懸
纍纍

玉山草堂爲沈南叔賦

東老草堂在何許崑玉峯前婁水陽恠石當門
猛獸伏長松遶屋神輪翔芸牕展卷聲琅琅若
出金石諧宮商嵩高山中隱者所浣花谿上詩

人庄小亭野芳發幽香漚波淼淼涵天光南鄰
老翁覓酒伴短筇緩策行徜徉草堂之樂樂無
央豺虎遁蹟罔兩藏何人寫圖落塵世乃是四
明狂客老更狂生帑潑墨兀老蒼

青松白石軒

高人種玉玉山中上有支離之恠松絕壑雲根
蹲虎豹陰崖雪幹騰蛟龍青飢飯受神僊訣金
粉花浮琥珀釀爲折長枝當麈尾何妨踞石語
從容

郭義仲新莊

抱郭春流帶草堂四瞻桐梓曉蒼蒼百花潭上
詩人宅五渡谿頭處士莊且喜比鄰連伯姊不
愁行酒少兒郎西郊從此頻相過剪燭論詩夜
未央

玉山高處和郭義仲韻

郭翼

玉山高處開闌檻夾徑新松箇箇青日落翠微
延晚閣雨來龍氣濕秋屏檐垂星漢雲凌亂鈎
拂珊瑚樹杳冥揚子文章吞北海高名直貫鵲
湖亭

書聲齋爲姚子章賦

幽人一室開風露坐想瀛洲玉爲署把書夜坐
秋滿空徘徊花影蟾蜍樹蓮葉艇子風泠泠太
乙下照藜火青笙簧萬耳洗不醒謬哉太音誰
得聽

蒼筤竹軒爲馬敬常賦

清風峽上蒼筤竹箇箇繞軒陰滿庭秋聲夜覺
湘波遠雲氣曉拂鑑湖青親題白野尚書額好
勒金華太史銘老去幾時探禹穴與子同躡鳳
凰翎

殷氏書堂三和孝章韻

孝伯殷奎也

盧熊

先翁樂丘園手植中庭橘歷年滋漑灌繁陰政
蒙密霏霏吐雪英磊磊星垂實歲晚共旨甘慈
顏諒夷憚

婁曲書堂

我愛婁江曲高齋絕市喧詩書心共遠師友道
彌敦秋露溥朱橘春暉散紫萱清朝訪遺逸東
帛到丘園

婁曲書堂爲殷君叙賦

謝應芳

書堂何幽幽乃在婁江曲波光照牕几山氣潤
琴筑嘉爾隱君子德音粹如玉籛金散無餘編
簡富儲蓄焚香白晝靜教子時共讀階庭春草
生亦作書帶綠有時暫游息引領寄遐矚流雲
下晴空幽鳥鳴灌木於焉得自娛蔬食猶食肉
我願從之游白駒在空谷

汨波婁水東連于海爰有幽貞居婁之滙艇舟
岸泊婁人紛挐幽貞有子劬書厥家晨雞旣鳴
汛埽室堂羞我甘輒奉持趨蹌我經我史如耕

雜詠九
如桑我服其勞罔敢怠荒黍稌有田魚亦有梁
味道之腴游藝之場曰父與子欣欣樂康其樂
維何匪人伊天憧憧往來誰其語旃

崑山陳伯康築亭山巔楊鐵崖扁曰玉山
高處且為賦詩邀余及郭義仲劉景儀
殷孝伯盧公武同賦

神僊中人鐵笛老為爾玉山雙眼青玉山高處
拄手板鐵笛醉時圍肉屏天生丹穴鳳為石東
望黑洋鯤出溟一代風流有如此名齊西蜀子
雲亭

江雨軒為偶武孟作

春雨如暗塵江鄉晝冥冥幽人感時變於茲事
耕耘江雨亦屢作江風穆而清土膏潤如酥草
木努甲生此竟誰為之曰維天之誠我藝我稷
黍我軒泊我宇晨興帶經鋤寧惜作勞苦嘉苗
既芘芘田畷為之喜霜飈一披拂致此歲功美
斗酒以自勞共入此室處矧茲值時康樂哉詠
江雨

靜得齋為海道顧仲淵漕使作

釋來復

來復字見心號蒲菴豫章豐城
人能精內典工詩文元未甚有

名洪武初以高行徵後以作詩忤旨被殺

細草幽花映戶榮
閒觀物理寄浮生
人間利祿心無競
海上風濤夢不驚
野服看雲秋色遠
石牀臨水晚涼清
年來我亦忘喧寂
猿鶴空林擬結盟

靜安齋為張處士士行作

李時勉

人之一心明鏡止水外
誘中移汨濁昏翳反求
厥初未嘗或昧昧者
不知知者不戾膏車脂轄
以求其至至則得之
何所不遂隱居達道各臻

其詣惟君之明惟德之懿
銘以昭之用勗來裔

又

楊翥

翥吳縣人性端敏凝重師事楊士奇受易洪熙初薦為翰林檢討累

遷禮部尚書致仕祿之終身年八十五所著有希顏集

惟靜廼專一專一斯能安
以其不妄動外物何由
于齋居既幽邃映帶皆
林巒綠水何逶迤白雲
在檐端析義窮精奧觀
理造微玄波定爰鑑物
谷虛聲以傳靈府既有
得恍如隔塵寰

拙菴

陶振

振字子昌吳江人少學於楊維禎洪武末舉明經授本縣學訓導嘗

蘇詩

坐佃居官房逮至京師上紫金山等賦改安化教諭卒振天才超逸工詩所著有鈞鼈集

婁江之側有崑丘拙菴道人居上頭江聲到枕
或成雨海色滿簾都是秋守株曾得山中兔托
跡竟比林頭鳩有愚還學柳州柳有身却作囚
山囚平生自咲何太拙耻向權門事干謁分甘
巢許一身閒不掉蘇張三寸舌所以頭最拙有
髮不能冠所以手最拙有琴不能彈鄭衛之音
有耳不能聽毛嬙子都之色有眼不及觀嗟嗟
若人誰得似漢陰丈人差可擬既看形骸若槁

木想見寸心如止水分明有類抱朴翁只疑便
是玄真子釣鼈先生來海門相見婁東黃葉村
手持先天書一卷白日共向林間論騎牛却入
山中去濁酒同傾老瓦盆

又

朱吉

吉字季寧崑山人澤民之子洪武中以學行薦入為戶科給事中再轉湖廣僉事獄無冤滯太宗命題太祖高皇帝神主眷賞特厚年八十一卒所著有五齋集

太朴本自然世降巧偽妍孰知巧多困徒為朴
者憐諄諄好學士當窮道本源本原豈有外物

佳水

欲相鈎牽幽泉洗心白靈籟息耳喧悠哉抱朴
人應能達此天以身驗機巧古朴追前賢

俞貞木

初名貞字貞木後以字行更字
有立吳縣人性好古有苦節工
古文詞洪武初以薦授樂昌都昌令
為鄉人所誣逮詣京師卒所著有立

菴集

古道久寂寞淳風日澆漓人心轉機巧變幻益
以滋樂哉長嬰氏以拙名其居居處無長物素
琴與古書願從園綺游耻為蘇張徒無能守一
拙百巧將焉如春風草木香夜月牕牖虛不近
人世此樂人少知相逢無可語聊以歌古詩

翠濤軒為則明作

呂誠

梧竹幽深處士居八磚日轉午陰移到門不敢
題凡鳥自染龍香寫好詩

翠葆如雲過屋高金風為我掃炎熇五更萬壑
秋聲滿疑是僊槎駕海潮

七尺烏藤手自操鯉魚風起月輪高帶將一箇
城南樹五賈岡頭看翠濤

馬公著見山樓

袁華

徒倚雙林萬木秋好山都在馬家樓大江西上
經秦望巨壑東傾見沃洲半夜書聲天外落四
檐風氣座間浮登高作賦休懷土擬泛星槎問
斗牛

菊田

呂誠

余客竹州三年頗有彭澤東籬之好
古人亦謂菊獨以秋花傲兀於搖落
之後非霜下之傑乎昔年曾賦對菊
之歌老興未已復作菊田一首以紀

歲月耳

搖落西風已愴然金蕤月朶爲誰妍人間無地
安花宅洲上于今有菊田晚歲擬尋甘谷老顏
齡幸值傳延年落英餐盡秋香骨許我飛行作
地僊

崑山雜詠卷第九

崑山雜詠卷第十

題詠

玉山草堂

玉山草堂者顧仲瑛讀書絃誦之所
以茅茨雜瓦為之櫛比數百楹繚四
簷周徧植梅竹及珍奇之石幽閒佳
勝合于巖棲谷隱之制

釋良琦

良琦字元璞天平興慶寺僧有詩名

玉山草堂婁水西雜樹遠近春雲低王維昔賦
宮槐陌杜老亦住浣花溪彈棊局在高梧落委

珮聲傳暮竹迷閣老文章全盛日釣竿盤石慰
幽棲

陳基

基字敬初臨海人從黃潛學授經筵檢討其徒有為御史者以諫忤

旨連基遂避歸至吳時張士誠為太尉基參謀軍事士誠欲自王基獨為

諫止遂累遷學士一誠就俘基從入京記多出基手及士誠就俘基從入京

卒得宥免預備元史而還洪武二年卒于常熟基為文清雅所著有夷白

齋集

隱君家住玉山阿新製茅堂接薜蘿翡翠飛來
春雨歇麝香眠處落花多竹枝已聽巴人調桂
樹仍聞楚客歌明日扁舟入州府不堪離思隔

蒼波

王蒙

蒙字叔明吳興人善畫趙文敏之甥自號黃鶴山樵又曰臯亭主人

玉山草堂近秋水當畫煙雲生蓆茵簷間鷗鷺
下白雪牀有琴瑟娛嘉賓虎頭癡絕丹青在鵝
帖臨摹紙墨新料得西風收穫竟焚香茵閣坐
清神

楊維禎

愛汝玉山草堂好草堂最好是西枝浣花杜陵
錦官里載酒山簡高陽池花間語燕春長在竹
裏清樽晚更移無奈道人狂太甚時携紅袖寫

烏絲

秦約

華構連山起春雲隔樹陰雨聲魚罟滿草色鹿
場深洗硯收金匣鈎簾動玉琴相過有于鵠燕
坐共長吟

玉山佳處

顧仲瑛家界溪之上為園池別墅治
屋廬其中名其前之軒曰鈞月室曰
芝雲東有齋曰可詩西有舍曰讀書
後累石為山而亭其前曰種玉山之

上曰小蓬萊山偏之樓曰小游僊後
有堂曰碧梧翠竹樓曰湖光山色之
樓過浣花溪為草堂又其東偏為漁
庄柳塘春臨池之軒曰金粟影合而
名之曰玉山佳處

王禕

禕字子充義烏人幼竒敏絕人與

宋濂同師事黃潛洪武初授江西
提舉司校理遷起居注同知南康事
召修元史為總裁官擢翰林編修使
雲南為梁王把都所害追贈學士謚
忠文所著有華川集玉堂雜著諸書

玉山何岩堯亭館發佳氣雨過井上梧風生石
邊桂芳樽侑嬌歌謔笑雜清議論交不須深對

酒且成醉情諧畧細儀理會忘外累孤蹤苦無
常良集詎云易未知今日歡明日復何地

于立

春風昨夜起吹蕩滄江水幽人渺何處迺在玉
山裏玉山秀色何崔嵬滄江之水長縈迴縈迴
不盡遶山去但見滿谷桃花開草肥青野鹿呦
呦花下殘棋暮不收隣家野老長携酒溪上漁
郎或艤舟幽人讀書忘世慮結屋山中最佳處
世上紅塵空白頭携書我亦山中去

張天英

天英字南渠清河人

玉山有佳處迺在崑崙西蓬萊數峯小上與浮
雲齊雲中飄飄五色鳳只愛碧梧枝上棲芝草
琅玕滿玄圃群僊共躡青雲梯太湖三萬六千
頃水流入桃花溪溪頭浣花如濯錦百花潭
邊浮紫泥紫皇拜爾山中相閒把絲綸草堂上
漁莊一釣得龍梭龍女吹簫書畫舫西風玉樹
金粟飛東風柳浪金波漾歲歲年年樂事多綠
野平泉何足尚十二樓前看明月太乙明星夜
相訪酌霞觴瑤臺露濕芙蓉裳我亦桃源隱居
者握手一咲三千霜

楊維禎

山迴古縣六七里潮到維亭第一家翡翠明珠
通百粵竹枝銅鼓出三巴山公酒醉童將馬禪
客詩成女散花須信西園圖雅樂佛中脫縛有
丹霞

荆山道人曾有約約過溪頭金粟家江上降龍
重見朗酒邊吹雨或成巴春歸駟馬橋頭柳月
滿蕃禧觀裏花鐵笛東歸還小住僊源不隔赤
城霞

倪瓚

至正九年八月十六日計籌山呂尊
師訪余蕭閒館爲余言顧仲瑛徵君
玉山隱居之勝輒想像賦長句以寄
他日尚同袁南宮携琴嘯詠竹間也
解道玉山佳絕處山中惟有呂尊師已招一鶴
來庭樹更養群鶩戲墨池松風自奏無絃曲桐
葉新題寄遠詩若許王猷性狂癖徑來看竹到
堦墀

玉山席上作就呈同會

曹睿

睿末
嘉人

我到玉山最佳處溪頭新水蕩輕舸春回綠圃
花如霧風入蒼梧翠竹濤越女雙歌金縷曲秦
箏獨壓紫檀槽詩成且共揚雄醉咲奪山人宮
錦袍

于立

綠樹當門過屋高滿溪新水繫雙舸千林夜色
懸青雨萬頃晴雲捲素濤鸚鵡傾杯傳翠袖琵琶
度曲響金槽揚雄賦就風流甚製得輕紅小
袖袍

柯九思

神人夜斧開青玉一片西飛界溪曲中有桃源
小洞天雲錦生香護華屋主人意度真神僊日
日醉倒春風前手揮白羽扇口誦青苔篇袖拂
荆山雲足躡藍田煙飄飄直向最佳處漱潤含
芳擘琪樹世間回首軟塵紅不須更向蓬萊去

華翥

翥字伯翔
吳興人

我聞玉山最佳處翠竹高梧夾行路陰陰石洞
響流泉歷歷青山隔春霧草堂窈窕煙水西楊
柳漠漠鳴黃鸝華間委珮僊客集水上清唱漁
舟迷巖頭桂子飄金屑石上芝雲白於雪何曾

夢入小游僊長夜持竿釣明月玉堂學士天上
來相逢一咲華筵開千鍾綠酒金莖瀉五色新
詩雲錦裁美人高歌醉擊筑下堂送客燒銀燭
明朝迴首望僊槎月出金盤照華屋

釣月軒

張翥

翥字仲舉晉寧人至正九年海道糧餉畢達京師時以天妃神靈封香遣祀中書以翥貳直省舍人彰寶遍禮祠所事竟還次吳門顧均仲留燕草堂遂有此作翥自幼豪放好蹴踘音樂父憂之一旦折節閉戶讀書父時為安仁典史遂受業安仁大儒李存又從杭郡仇遠先生學卒以詩文知名後累官翰林學士承旨封潞國公

玉山山下水滿池池水秋雨深夜深明月
出滄海照見池邊巖桂枝華陰故人美如玉獨
坐蒼苔垂釣絲一絲涵影秋娟娟待到月來花
上時苦吟忘却魚與我但覺兩袖風颼颼引竿
釣破廣寒碧乘興攪碎青玻璃不知今夕草堂
醉咲領洛神張水嬉明朝回首越來道獨看月
華多所思

虞集

集字伯生隆州仁壽人虞忠肅允文之後隨父汲僑居臨川天性孝

友弘才博物累遷奎章閣學士日取經史中切心德治道者陳進經筵尤隨事規諫一時大典冊咸出其手平生為文萬篇有道園學古錄行世卒

雜言十
贈仁壽公
謚文靖

方池積雨收新水三四尺風定文已消雲行影
無蹟淵魚既深潛水華晚還出幽人無所爲持
竿坐盤石

芝雲堂

顧仲瑛嘗得異石於顧氏之漪綠園
輪困明秀如卿雲扶踈縝潤又如芝
草合而名之曰芝雲因以名其堂

于立

僊人誤讀黃庭經神光墮地如流星地氣忽與

天光凝靈芝輪困結浮英杖撞雙檢聲彭訇居
然異境標殊庭霞裾珠璫翠羽屏天樂桂樹風
泠泠張騫夜騎赤鳳翎函香南荒杳冥冥精誠
一念通真靈海若縮息波濤平芝雲堂中咲相
迎美人如花酒如澗咲談未了離別情飄然乘
風朝 帝京五色慶雲三秀靈朶永瑞世開
皇明

鄭元祐

僊家芝草燁五色海日一照蒸成雲結爲樓觀
霄漢上千門萬戶春氤氳斑龍誤騎有謫籍雲

旂夜下星宮君忽焉墮地變爲石昆吾有刀切
不得巖壑高深翠濤積卿雲輪囷瑤草碧未鎮
金粟僊人宅

秦約

海上金銀鴨朝暉散景遲春明一卷石雲護九
莖芝玉氣騰深谷虹光射曲池何當祠太乙采
采侯靈旗

可詩齋

仲瑛博學好古尤潛心於詩爲敞堂
與館延四方賓客觴咏其中遂名其

齋曰可詩

袁華

東閣官梅放西池春草芳宴坐尋真賞懷人意
不忘

顧仲瑛

木葉紛紛亂打牕淒風淒雨暗空江世間甲子
今爲晉尸裏庚申不到龐此膝豈因兒輩屈壯
心寧受酒杯降與君相見俱頭白莫惜清談對
夜缸

讀書舍

張天英

近聞東觀藏書室乃在崑崙玄圃臺群玉山頭
海月出武陵溪上漁舟來故人十載草堂別僊
家九月桃花開太白時時吹鐵笛對酌花前鸚
鵡杯

種玉亭

釋良琦

久愛幽棲似學僊山中種玉不知年綠陰分綴
三危露瑞氣飛成五色煙璞裏辨文裁襍珮囊
中食法自藍田安知此地非蓬島月下鸞笙夜

夜傳

小蓬萊

青城虞翰林嘗作步虛詞四章仲瑛
藏之玉山小樓楊庶夫以其詞有楊
許玄隱之風遂名其樓曰小蓬萊

虞集

步虛長松下流響白雲間華星列燿火明月懸
珮環肅然降靈氣穆若愉妙顏竹宮愴清夜望
拜久乃還

朱光出東海高臺迎赤曦六龍獻陽燧九鳳保

金支鍊丹軒轅鼎濯景崑崙池拜賜水玉佩玄
洲共遨嬉

稽首望太霞離羅間層霄細縕結冲氣要眇出
空謠前叅千景精後引務猷收攝衣上白鶴招
搖事晨朝

學僊淮南王問道劉更生三年鍊神丹九載凌
上清日月作環珮雲霓爲旆旌回首召司命靈
雨灑蓬瀛

湖光山色樓

太湖西南下遶陽山海虞山麓東流

匯爲陽城湖湖之上有大林樾神秀
融結者是爲界溪仲瑛爲樓于溪之
上旣登斯樓憑高四望惟見風檣往
來漚波出沒而山色葱蘢掩靄三山
十洲宛焉在目因名之曰湖光山色
之樓蓋草堂景物之尤勝者

楊維禎

僊家十二樓俯瞰芙蓉渚象田耕玉煙龍氣生
珠雨鳳麟遠水接空濛小瀛夜折蓬萊股蘭臺
美人能楚語十三鴈急孤鸞舞仙人醉騎黃鸝

來醉揮落日使倒迴翦取璫田一稜歸滿天鐵
笛走春雷

秦約

快閣初延望流雲乍度檐沙明蕩瑤席山色上
牙籤杏葉浮波淺桃華隔岸添隱囊西景暮坐
見月纖纖

鄭元祐

顧家湖光山色樓登覽近在屋西頭朝煙帖水
白如練晴雲出塢青相繆浪花鏢閃上初日崖
氣高寒成凜秋宿草遙瞻仲雍墓孤帆誰張范

蠡舟靈來恍若雲旗下物換依然汀草抽何人
孤笑荅漁唱有客五月披羊裘主人引客遙指
點童子昔時曾釣遊王門曳裾塵眯目客卿擔
簷雪滿頭何時長年登臨咲樂老於此孰與儔
玉關西望不得入辛苦纔封定遠侯

浣花館聯句

楊維禎

至正戊子六月廿四日維禎與衛輝
高智匡廬于立清河張思賢汝南袁
華河南陸仁燕于浣花館酒闌主客

聯句凡廿四韻主爲玉山顧瑛也

大厦千萬餘小第亦云甲馬山分玉崑顧鯢津

類清雲湖吞傀儡深立江馮吳淞狹地形九曲

轉賢峯影千丈插斜川萬桃蒸華小逕五柳夾

僊仗撞石檢仁靈洞開玉匣雲停清蔭初瑛涼

過小雨霎鶴舞竹籬裊禎鷺亂萍喋唳風顛帽

屢歌立暑薄衣猶挾花從羸女獻賢酒倩吳姬

壓簾捲蒼龍鬚華盤薦紫馳胛戎葵粲巧笑仁

文瓜印纖掐白鬣魚乍剖瑛紅蓮米新甬急觴

行葡萄禎清厨扇箏箏火珠梅燁熿立冰絲尊

浹滌雲雷摩乳晏賢琤琤玩腰泖伶班鼓解穢

華軍令酒行法弓彎舞百盤仁鯨量杯千呷腔

悲牙板擊瑛調促冰絃壓客歡語噉禎童酣

臯駒貽酒徹給泓穎立詩成繕書劄嘔句投錦

囊賢披圖出緗笈驪駒歌已終華青蛾情尚狎

求矢交友盟仁銅盤不須軟瑛

崑山雜詠卷第十

崑山雜詠卷第十一

題詠

柳塘春

郭翼

陰陰覆地十餘畝
嫋嫋迴塘二月風
雨過鷗眠沙色裏
花飛鷺亂水聲中

昂吉

吉字起文
西夏人

春塘水生搖綠漪
塘上垂楊長短絲
美人蕩槳唱流水
飛花如雪啼黃鸝

秦約

弱柳金塘上春濃岸岸連樹深停野騎花送渡
江船燕蹴初晴雨烏棲欲暝煙沿洄正延竚落
日棹歌還

郊韶

韶字九成
吳興人

美人遠在春塘住門外垂楊千萬樹微風白日
裊游絲渡水輕陰蕩飛絮使君來自白玉堂攀
條欲結雙明璫門前繫着紫騮馬上堂急管絃
清商美人起舞爲君壽再拜登歌酌君酒使君
明日上長安莫唱春風折楊柳

漁莊

玉山佳處之東其地雖沮洳蓁莽仲
瑛以其有異景遂夷其忍水與草築
室于上環引溪流縈繞如帶而楓林
竹樹蘭茗翠羽掩映相鮮可方可舟
漁歌野唱宛在茗雪間也禮部白野
兼善榜其顏曰漁庄

袁華

公子不好獵小莊濠上居長船載大炬清夜看
叉魚

于立

二月春水生三月春波濶東風楊柳花江上魚
吹沫放船直入雲水鄉蘆荻努芽如指長船頭
濯足歌滄浪蘭杜吹作春風香得魚歸來三尺
強有酒在壺琴在牀長安市上人如蟻十丈紅
塵埋馬耳漁莊之人百不理醉歌長在漁莊底

楊維禎

君不見裴家之莊在子午臺池已作張家墅又
不見李家之莊在平泉花石亦入陶家園不如
漁莊在崑之所官不得奪人不得取或言投長
竿躋會稽釣嚴灘隱磻溪彼數子者逃名而名

至孰能索我於東溪之東西山之西春江冥冥
春水瀰瀰桃花亂流跳魴與鯉會稽丈人本釣
徒釣竿手拔珊瑚株浩歌小海入東去大魚鱗
鱗來媵予予知我我知魚濠梁之樂樂有餘

釋福初

君家漁莊在何處江波迢迢隔煙霧清秋獨釣
蘆花風明月長歌白蘋渡高堂絲管延佳賓舉
網得魚皆錦鱗小奴鸞刀出素手金盤斫鱠如
飛銀走也山林老釋子拄杖行吟嗟未已平生
雅有濠上游相思瀰瀰東流水

金粟影

釋良琦

幽軒欄檻絕低小
渾似昆耶文室空
金粟花浮雙樹月
白蓮香散一池風
每聞天鶴乘雲外
莫遣僊姝入座中
却恠袈裟留住久
釣船猶繫柳橋東

鄭元祐

巖桂花開江浦流
辟疆園裏舊曾遊
天方雨粟成金色
風直吹香上玉樓
空裏寶雲獅子座
鏡中絲髻鸚鵡裘
嫦娥手種誰攀得
一曲鸞笙萬

壑秋

彭采

開牕見明月團團
弄清輝湛露下庭柯
幽香發華滋手舉青玉案
喜與僊人期
遨遊青雲中
遺我最高枝
茹芳嚙瓊液
插花醉瑤池
中有群鳳鳴
景星亦相隨
高軒夜深坐
秋影正葳蕤
勿持廣寒府爲賦
小山辭

顧瑛

飛軒下瞰芙蓉渚
檻外幽花月中吐
天風寂寂吹古香
清露泠泠濕秋圃
金梯萬丈手可攀
居

然夢落清虛府庭中搗藥玉兔愁樹下乘鸞素
娥舞瓊樓玉宇千娉婷中有癯僊淡眉宇問我
西湖舊風月何似東華軟塵土寒光倒落影娥
池的礫明珠承翠羽但見山河影動搖獨有清
輝照今古覺來作詩思茫然金粟霏霏下如雨
書畫舫

仲瑛引婁水其居之西墅爲桃花溪
厠水之亭四楹上蓬下板傍櫺翼然
似艦牖其沉影與波動蕩若有纜而
走者楊廉夫嘗吹鐵笛其中客和小

海之歌不異扣舷者之爲中無他長
物唯琴瑟筆硯多者書與畫耳遂以
米芾氏所名書畫舫命之云

聯句詩

楊維禎

三月三日楊鐵崖顧仲瑛飲於書畫
舫侍姬素雲行椰子酒遂成聯句如
左

龍門上客下驄馬瑛洛浦佳人上水簾瑪瑙瓶
中椰蜜酒崖赤瑛盤內水晶鹽晴雲帶雨沾香

地瑛凉吹飛花脫帽簷寶帶圍腰星萬點崖黃
柑傳指玉雙尖平分好句才無劣瑛百罰深杯
令不厭書出撥鐙侵繭帖崖詩成奪錦闔香奩
臂鞬條脫初擎硯瑛袍袖弓彎屢拂髯期似梭
星秋易隔崖愁如錦水夜重添勸君更覆金蓮
掌瑛莫放春情似溼黏崖

鄭元祐

雪舫夜寒虹貫日溪亭臘盡柳含春將軍祝髮
聞全武隱者逃名愧子真醉裏都忘詩格峻燈
前但愛酒杯頻毛羹青點沿墻薺斫鱠冰飛出

網鱗稽古尚能窺草聖送窮端欲致錢神周南
老去文章在同谷歌終手脚股擗鱉歸來還自
咲聞鷄起舞意誰嗔盍簪豈料有今夕明日桃
源又問津

王蒙

亂後重登舊草堂主人延客晚樽涼風搖竹影
書籤亂花落池波硯水香離別頓驚年歲改夢
魂愁殺路途長欲知阮籍何由哭四海兵戈兩
鬢霜

春暉樓

春暉樓者仲瑛就養讀書之所因取
孟郊游子吟春暉句名之

袁華

春暉樓前春日長綠陰滿地鳴鸝黃紅紫紛紛
逐流水名花獨殿餘春芳粉容丹臉泣朝露飛
燕玉環雙靚粧天上故人官奉常風流不減章
臺張看花走馬日倒載五雲坊西千步廊撫時
懷舊多感慨每把新詩酬暢當楊州金盤大如
斗兔葵燕麥迷空塲人生胡爲不醉飲直待兩
鬢飛秋霜

秋華亭

于立

溪上新亭絕蕭爽四簷高樹碧參差香浮金粟
秋盈把涼沁瓊花月滿枝枝近東山深窈窕水
通遙漢共逶迤銀瓶細瀉深杯酒羅扇新題小
字詩曲倚瑤箏聲累咽歌停翠瑄舞頻歆露零
齒菑枝枝謝風入梧桐葉葉吹每憶天孫候河
鼓更煩星使問秋期道林明日難爲別更約山
公醉習池

顧瑛

開宴秋華亭子上共看織女會牽牛星槎有路
連雲渡河漢無聲帶月流取醉不辭良夜飲追
歡猶似少年遊分曹賭酒詩爲令狎坐猜花手
作鬪最愛柳腰和影瘦更聽鶯舌弄春柔金莖
露落仙人掌錦瑟聲傳帝子愁絡緯豈知都是
怨芙蓉莫恨不禁秋紫薇花下微風動重欲移
樽爲客留

釋良琦

片玉山西境絕偏秋華亭子最清妍三峯秀割
崑崙石一沼深通渤澥淵鸚鵡隔牕留客語芙

蓉映水使人怜桂叢舊賦淮南隱雪夜嘗迴剡
曲船北海樽中長瀲灩東山席上有嬋娟紫薇
花照銀瓶酒玉樹人調錦瑟絃醉過竹間風乍
起吟行梧下月初懸一聲白鶴隨歸佩何處重
尋小有天

淡香亭

秦約嘗得趙文敏公所篆淡香二字
遂以遺仲瑛仲瑛因作斯亭邀同儕

賦之

盧昭

佳水

玉山佳處野亭分千樹梨花白似雲僊袂倚風
林下得澹香和月夜深聞生憎蛺蝶迷春色不
待狡狴換夕熏西郭東闌已陳蹟總傳芳扁重
鵝羣

殷奎

奎字孝章一字孝伯其先自華亭徙崑山少從楊維禎受春秋洪武

初以薦赴京師試高等授州縣職因
母老請近地便養忤旨調西咸陽教
諭在任四年念其母鬱鬱而死年四
十有六門人私謚文範先生為文精
於理學尤勤纂述所著有道學統緒
圖家祭儀崑山志咸陽志關中名勝
集陝西圖經婁
曲叢藁等書

澹香亭外花無數盡說清明似洛中西郭愛看

千樹雪東闌生怕五更風何郎酒怯春羅薄荀
令香熏霧縠空吹遍內園天上曲坐深清夜月
朦朧

君子亭

仲瑛所居泉石幽邃篔簹數百箇照
映几席翠氣浮動彷彿徂徠竹溪之
勝因以所藏趙文敏公君子亭三大
字以榜其顏安陽韓性明善甫為之

序

張天英

玉山隱者蓬萊客洞府蕭森鎖寒碧亭前常與
鶴同行亭外斷無車馬蹟中有方丈之瓊田種
出琅玕數千尺雲動琅玕翠欲飛雲去琅玕淨
如拭天風吹作鳳凰簫地上殘雲化爲石醉墨
淋漓節下書脩脩鳳尾玄珠滴王君一去今千
年對此令人重相憶

陳聚

聚字敬德
天台人

聞君結屋滄江上萬竹青青帶薜蘿滿谷風聲
秋不去隔林雲氣雨偏多僊人騎鶴吹笙下狂
客題詩載酒過日暮新涼動蕭颯娉婷翠袖欲

如何

雪巢

雪巢在梧竹堂之右偏楊廉夫序云
上古未有室廬則民有櫓巢而居者
至陶唐之世尚有巢父之流以樹爲
窟與羽族同棲者想其當霰雪之集
與木介同冰是有雪之寒無雪之清
者也後世乃有借光于竇者謂之雪
窓致爽于高者謂之雪樓而又有假
屋于巢假巢于雪者謂之雪巢是有

雪之清無雪之寒者也

鄭元祐

太古有積雪不在西蜀西蜀之西雪山遠斷
冰千仞難攀躋豈如界涇之上肅侯宇虛室生
白皦如楮正猶雪積太古前表裏空明湛中處
其處者誰世寡儔純淨不涅緇塵羞素履恒因
積後見冰潢夜轉銀潢秋遂儼巢居葛天氏不
在木末并山頭三辰借明啓牖戶九霄排雲通
逕路昊天月明日將曙螺盤盛得金莖露借問
修梁初舉時見者喜氣盈芝眉巢成定產九苞

鳳我老爲賦卷阿詩

陳基

至正十年十二月積雪彌旬玉山主人邀予與于匡山煮茗於雪巢爲賦
煮雪窩

草堂之仙人隱居玉山陞盜泉不肯飲惡木不
肯棲就山爲窩煮山雪雪勝玉泉茶勝芝煮以
彭亨菌蠹之石鼎焚以感縮擁腫之樹枝恍聞
松風洶湧出澗壑化作雲氣爛熳上欲干虹霓
匡廬道士來會稽嬉咲怒罵皆成詩尋常一飲

即一石踏破甕中天地皆醯雞不厭陶家滋味
薄却愛玉川文字竒舉碗猛吸如鯨鯢悠然相
對如賓客窩中自來無町畦乃知渾沌鑿不破
縱使先天之子亦莫窺端倪逍遙咲殺南華老
夢與蝴蝶隨春迷

春草池

釋良琦

桃溪綠水接深池芳草如雲護石磯色映緗簾
春雨細波明畫舫夕陽微最憐才子新成句因
憶王孫久未歸况有高亭更蕭爽日長留客看

清暉

法堅

堅雲門
寺僧

雪消春色滿江沱芳草纖纖覆綠波最是高陽
池上客狂歌無奈醉時何
亭前修竹淨漪漪煙煖沙頭杜若肥一夜雨餘
春水漲白鷗日日到柴扉

顧達

達吳
郡人

碧色漲春雲圓文生暮雨稍平楊柳岸已沒鷓
鴒渚錦鱗唼萍游蘭棹隔煙語曲欄倚東風懷
人渺南浦

碧梧翠竹堂

釋良琦

碧梧翠竹之高堂，迺在玉山西石岡。濃陰晝護白日靜，翠氣夜合清秋涼。堂中美人雙鳴璫，不獨癡絕能文章。北海李生共放曠，東林惠遠同徜徉。張騫乘槎下銀潢，奉詔遠降天妃香。帷中靈風神欲語，壇上五色星垂光。舟迴鯨濤逝長江，故人宛在江中央。入門相見各青眼，花開促席飛霞觴。清歌遏雲錦瑟張，亦有衆賓相頡頏。櫺衡賦就故驚座，寬饒酒深真醉狂。黃河東流

鴈南翔，輶車明朝歸帝鄉。玉堂掖垣梧竹長，題詩寄遠毋相忘。

崑山雜詠卷第十一

崑山雜詠卷第十二

題詠

索笑圖詩 并序

馬先覺

先覺字少伊崑山人乾道初登進士第為海門主簿累遷兵部

架閣素高逸不事請謁號得閒居士以崇議郎管台州崇道觀卒所著有

集 慚筆

余有小野在甫里之東將營草堂種

梅以娛老命陳良士圖其意為作陋

質幅巾藜杖巡簷玩香殊有逸趣因

號索笑圖且賦詩以志之

封侯無骨登凌煙食肉無相當萬錢君看簷下
偃蹇者如何頭上著貂蟬雅宜置之一丘壑了
此三生梅竹緣雲巖露落月照水有美玉樹臨
風前影窺踈櫺香破夢隱几維摩起幽禪杖藜
微步遶千匝一笑與花俱欲僊呼童秉燭進詩
具折香來薦冰壺泉少陵此興隔千歲顧我素
好亦同然但覺搜腸乏妙語也擬著句開雲牋
牀頭盎盎春有味案上泠泠風入絃人生適意
政須爾何用底死浮名牽是圖落筆有妙解先
事立意非徒傳草堂之資吾辦久不學杜老長

乞憐甫里下田儻逢年便判百斛買江天

題玉山讀道書小像

袁華

靈嶽聳層霄瑤館闕金鄉若人秉昭質守一修
洞房呼吸龍虎氣嗽嚙日月芒龜闕西瑤臺中
有明光章下授小兆臣玉檢鸞回翔稽首校隱
文琅毫耀霞光絳蕉承寶露肉芝骨玄霜采掇
充服食味傾金梨漿消搖澹無爲壽期穹壤長

題顧仲瑛摘阮小像

夫君青雲姿逍遙在丘園冥心絕遐想燕坐息

衆喧擁書白石上摘阮青松根乃非竹根叟似
是豐陵孫

題倪雲林山居圖

袁華

地僻無輒蹟知爲靜者居山泉激石駛岩樹覆
窓虛洗藥坐濯澗負苓行讀書茲山儻可老吾
欲樂耕鋤

題鶴亭詩藁

鶴亭詩呂敬夫所作也

虞集

三幅吳箋二十詩才華宮錦翠蛾眉長吟易盡

愁無那抱膝茶煙兩鬢絲

東南嘉麗盛長歌水碧空青苦未多鶯轉上林
千樹柳但聞新詠奏雲和

題林居圖兼簡盧公武

高啓

竹梧翳苔石知是幽人居林間鳥鳴後亭空賓
散餘聞有盧鴻愛長年留著書

題玉山佳趣卷

邑人朱宗海家有玉山佳趣堂

盧儒

弱植寡榮慕丘壑協幽襟結構傍岩阿開扉依

水潄早窺白雲谷夕眺蒼煙岑嵐霧紛菴葺術
徑闕陰森屢伸獨往願所適窮討尋始訝礙回
磴忽覺通密林垂袂承緒風拖杖肆微吟步緩
忘疲蹇興遂登嶽峯翻碑字文滅弔塚蘚苔侵
劉過負氣節王葆道潛心惠政佇民思紀詠遺
芳音仰賢覽八極萬化歸消沉唯有綿清譽亮
可徵古今

雪篷圖詩

蔡子堅者家吳淞之上日以畊
友嘗作漁舟江上其篷牕船屋不事
藻繪惟以粉堊為飾名曰雪篷子堅
時把釣垂綸携琴引鶴得魚酤酒命
客賦詩其中以適其志俞真木馬公

振輦以為愈于乘
興于剡溪之上者

馬磨

雪之蓬兮維子之舟謝叶雪之江兮可釣可漁舟
之中兮有琴有書貞白相看兮其志弗渝扣舷
而歌兮樂以忘憂於叶
江之清兮一葦可航歲云莫兮雪壓船篷逢叶江
波不運兮白鷺雙雙賦詩酌酒兮邀我良朋旁叶
我既醉兮泊此漁莊

王逢

逢吳郡人號
蓆帽山人

歲晚天空玉一簑滿船書盡壓銀河鮫入室露

雙冰鯉神女峯沉幾翠螺夢裏客星辭帝座尊
前小海度漁歌高明益進中庸學日詠東家綠
樹多

朱吉

寒透踈篷雲正低逸人江上託幽棲夢迴陡覺
瑤光襲醉坐遙看野色迷底用山陰訪陳蹟絕
勝月夜泛清溪漁郎杳失桃源路萬樹梅花暗
滿蹊

蕭規

規字元則長沙人國初徙居吳江
再徙郡城其學長於春秋及毛氏
詩樂道不仕號稱竹園先生所著有
湖山樵寓集

吳榜何年過東澗帶得山陰一篷雪春風浩浩
吹不消夜月娟娟照偏潔雪篷主人且好竒載
客日遊隨所之呼酒恒持金鑿落對花每品玉
參差咿啞柔櫓渡湖曲驚起鴛鴦不成浴汎汎
斜當瓊樹移搖搖宜傍銀槎宿棹歌齊發聲抑
揚高情獨愛水雲鄉從遊酬酢誰最密儒雅每
聞馬季長

謝應芳

鴟夷船載西施去遺臭五湖煙水路嘉爾吳淞
雪一篷江水曾無尤物汗篷牕洞開天雨花拖

樓屹立冰爲柱鵝鴨不驚柔櫓鳴鷗鳧渾在平
沙聚非熊無夢釣無餌如琴無絃得琴趣虎頭
能爲盡漁策驢背無勞覓詩句謫官潮陽八千
里獨策羸驂嗟道阻持節居延十九年饑嚙殘
羶亦良苦雪蓬之樂得於天雖欲同人人孰取
惟有山陰王子猷清興頗堪同日語

張節

百里吳淞浪疊沙布帆拖雪到漁家光浮四野
瓊樓曉影入孤村玉樹斜白鳥有聲迷荻渚青
山無路認梅花相逢不道寒江上銀漢初回使

者槎

妙聲釋子也

木蘭爲舟寬可宅團團中虛室生白朔風吹雪
著孤篷表裏皜然同一色中流蕩槳揚素波吳
兒自能小海歌酒酣恍如天上座洪濤只尺通
銀河雪蓬雪蓬奈爾何

管伯齡

謝應芳有贈伯齡詩

崑山之南濟陽翁家有艇子名雪蓬編筠爲廬
粉爲飾踈檣瑩白光瓊瓏潔如六花凍不解表
裏淨盡纖埃空主人倒着紫綺裘酒酣載月吳

淞遊叩舷高歌淶水曲遺音嫋嫋風颼颼天地
蘧篠一俛仰長江萬里冰壺秋

余詮

詮字士平江西豐城人穎敏博學工詩文至正間為江淞儒學提舉

徙居太倉

江天萬里雲同色四顧茫茫失南北獨釣曾無
簑笠翁孤篷祗有吳淞客篷上雪深篷底眠推
篷清思浩無邊渾疑柳絮孤村裏恍在蘆花淺
水前此時宇宙纖塵滅對酒不知寒凜冽傍人
共訝子猷回咲我寧同蘇武嚙便好身將鶴氅
披莫辭月下棹頻移剡中安道今何在乘興江

干欲訪誰

張樸樸號雪莊

江村歲暮江雲低天孫剪水江路迷大片飛來
一尺圍村中隱者猶好奇日落天寒酒力微投
壺放舟江之涯掀篷舉棹浩歌發壯懷不與漁
翁知江心觸濤奔怒馬錦帆開風雲作旗海門
東出三萬里弱水扶桑過如矢蓬萊十二白玉
樓照耀牙檣射光起仙人手持蒼龍髯拄頤相
顧情無已招邀暫停泊曠浪不作禮共飲瑤漿
醉侶泥仰空一咲天如洗

邾節

興盡山陰一棹還滿蓬清思大江干夢經銀海
三千頃目送瑤樓十二闌汗竹倚牕將映讀冰
壺滿眼不禁寒幾迴簑笠垂竿後一色乾坤醉
裏看

吳樵

寒白凝成玉一川誰當蓬屋醉神仙冰華忽斷
春無迹湖水不流風引船華蓋洞雲眉睫外蓬
萊珠樹拖樓前何人爲剪吳淞水挂向高堂快
雪天

倪瓚

手把玉麈尾身披素綺裘梨花縈夜月柳絮入
虛舟不作饑鳶詠其如載酒遊因懷剡溪興煙
水暮悠悠

樵海篇爲秦文仲賦

易恒

有樵何好奇不與衆樵侶樵海不樵山樵也安
所取東有扶桑根西有若木枝生長雨露外不
受斤斧欺誰能超溟滓採爲薪與蒸寘彼洪鑪
中陶鑄品物形滄溟渺無際詎云不可超有時

變桑田幾見塵埃漂朝過龍女宅暮宿鮫人館
珊瑚間珠樹露下光纂纂天吳與海若睥睨不
敢惜過之樵不顧何異爨下櫟逶迤度弱水彷彿
蓬萊宮至今採藥者猶是秦兒童相將邀我去
縹緲白雲際空青石上生瑤光雜如罽挹我
紫霞漿侑以蒼麟脯問我人間世如今幾今古
今古樵不言浩歌凌紫煙笑指斧柯爛柯爛知
何年歸來問茅屋只在東海隅鑿火煮白石高
卧哦詩書採樵不在薪煮石不療饑閉戶喚不
起不恠傍人嗤卻笑朱買臣老作會稽守辛勤

取富貴于今竟何有君為樵海人我歌樵海篇
歌竟海月出鶴語風泠然

世壽堂圖

壽誼翁姓周氏崑山人生宋景
定間歷元至國朝年百十有

六歲其子若孫四代皆登耄耄高
祖皇帝嘗召見賜宴及復其家後裔
孫震登正德中進士為侍
御史嘗顏其堂曰世壽云

唐寅

寅字子畏一字伯虎號六如居士
穎敏博覽為詩操筆立就畫尤秀
逸時甚重之嘗發解應天坐
事擯棄遂落魄自恣終于家

長山大谷出壽木雨露沾濡元氣足大枝為天
立四極小枝為君作重屋太平熙皞出壽人
皇風蒸煦壽域春雞巢小兒是鼻祖鳩枝老子

爲耳孫我朝 列聖傳仁義仁覆地載同天地
六合拈歸壽域中壽木壽人同出世木爲明堂
坐軒虞人爲老聃歌康衢固然 聖德甄陶就
亦是君家積慶餘周君四世爲人瑞魯玄耆耄
祖百歲從此堂將世壽名龐眉皓髮宜圖繪願
人同德復同心同心同德助當今天下同歸仁
壽域方顯 君王德澤深

陳沂

沂字魯南應天人正德初進士工詩與同郡顧璘齊名

高皇初定建康日老人召見來宣室自言景定
年中生親見海枯還見溢年過一百又十六拜

起猶便腰與膝兒同伯仲孫爲翁四世相呼白
頭出杜陵七十云古稀人生滿百今誰匹山中
但羨龐公安海上那有安期德柱史今爲六代
孫令德遺風口能悉我尋舊事登公堂秋日纍
纍照霜橘

崑山雜詠卷第十二

崑山雜詠卷第十三
題詠

張僧繇畫龍

慧聚寺張僧繇畫龍柱每因風雨夜騰趨波濤傷害田稼

僧繇畫一鏤鏤其柱仍畫一釘于上其害遂息

金陵安樂寺畫四龍不點睛云點之即飛去人以爲誕固請點之須臾雷

電破柱二龍乘雲而去獨未點者在又盡天竺二胡僧侯景亂一爲唐右

常侍陸堅所得堅疾夢胡僧來告云我有同侶在洛陽李氏若求合之當

以法力助君陸遂往求果得之劉長卿記其事其神妙如此

崔融

融吳郡人善五言詩唐乾寧初嘗有慧聚寺詩見虞氏詩話

人莫嫌山小僧還愛寺靈殿高神氣力龍活客

丹青

樂菴所藏柳影及松梅二畫因作二絕摹
作研花牋至今盛行於吳門

李衡

三月江南花滿枝風輕簾幕燕爭飛遊人休息
夜秉燭楊柳陰濃春欲歸
崔嵬霜幹欲凌雲俯映寒梢數尺春須信蒼髯
淨明老坐中容有散花人

題鶴亭鬪茶圖

鶴亭呂敬夫也

盧昭

花陰小隊鬪龍章渠盃香分第二湯莫傍酪奴
風味好內厨催送太官羊

題鶴亭所藏馬圖

張雨

九霄天馬俱龍種四十萬蹄雲錦斑一自漁陽
鞞鼓後不知幾個到驪山

集句題水仙圖

呂誠

秋水為神玉為骨山礬是弟梅是兄恍然坐我
水僊府吾與汝曹俱眼明

天育馬圖為海城鈕聲遠賦

渥水神駒駿骨全奚官羈勒漫相纏情知不是
塵中物春雷挾之飛上天

題黃鶴山樵畫匡山讀書圖

黃鶴僊人美如玉長年愛山看不足醉拈秃筆
寫秋光割截匡山雲一幅詩豪每憶青蓮仙結
巢讀書長醉眠我欲因之攬秀色雙鳧飛墮香
罍前

題黃筌畫竹鶴圖

并序

黃筌畫竹鶴圖一卷已入能品余鶴

亭舊有此圖心甚惜之散落他室今
數十年矣忽於鄉友處復見之喜歎
無已然尤物自為脛翼而能傲兀人
世不與歲月同化亦一奇哉因賦此
重為攬古者一慨云

蜀人黃筌寫竹鶴數百年間一奇作玄裳縞衣
意閒暇老氣崢嶸連林壑挺挺玉立雙琅玕枝
葉扶疏鐵鈎絡憶昔鶴亭有此本烏散煙銷久
冥寞今朝忽見喜絕倒老目摩挲殊不惡千年
令威安在哉舊物都非况城郭世間此圖亦希

有重襲尤宜置縑索高堂懸向明月中應有僊
音下寥廓

題顧定之風竹

盧儒

筆力鑿伊闕屈折洪河通六合走雲氣動地號
烈風洶湧海波立蜿蜒騰天龍疾揮出信意逝
水無流蹤踽踽邯鄲步分寸校程工昔人雖游
藝來者誰與同

題張子政黃大癡松亭高士圖

大癡老人天下士結客俠游非畫史酒酣潑墨

寫荆闕咫尺微茫數千里筍箕泉頭鶴上仙空
遺寶繪人間傳弟子顛張早入室重岡疊嶂開
雲煙太山斗絕何由緣下有鳥道丹梯懸此中
疑是避秦處仰見茅屋巖崖邊松亭寓目者誰
子耳譜流泉橫綠綺不知捷徑在終南每逢佳
處輒留止我生亦有山水癖吳楚燕齊遍游歷
風塵鴻洞難再往坐對此圖三太息

謝伯誠所藏王叔明狼山圖

袁華

憶昨鼓楫遡大江海門一點狼山碧安得振衣

躡層巔東望扶桑初日赤忽見此圖心目明石
壁鐵削芙蓉青仙翁白狼不復見金銀佛宇開
巖扃上方臺觀雲中起下瞰鱣濤千頃水平原
宅相放舟過吮墨含毫椀樓裏江南有客頎而
長夢覺池塘春草芳生平愛畫久成癖題詩緘
封遙寄將千古風流猶未弭翩翩王謝佳公子
日暮相思江水深獨立洲汀折蘭芷

野老移家圖爲謝子蘭賦

野老移家向何許迺在吳淞之甫里治生擬學
陶朱公釣竿欲覓玄真子小兒讀書坐船頭大

兒擊楫歌中流細君斫膾婦炊黍老子醉卧蘆
花秋人生真樂不易得兒女團藥居澤國避秦
何必問桃源朝泊江南暮江北

項方伯璵梅花卷

張泰

玉峯素卷三十尺越客含毫寫盡之一樹東西
春足後萬枝高下雪殘時只看踈影孤香動細
睨清顏衆色卑花滿江南未歸去詩成重起美
人思

題夏太卿墨竹次張黃門靖之韻

黃雲

前朝畫竹凡幾人太常繼之拔俗塵胸中有所
立卓爾以意發生今古春名飛九垓不容惜雲
動墨池留妙蹟假手放筆得竹神楚山搖光楚
江碧縱觀心醉忘其天天開始青群鳳騫天壇
落花不可埽森秀遠接蓬萊巔茫茫瀛海渺仙
路凌霞放杖迂仙步歷踐清華地位高雨沾露
潤承天數紛紛作者那許同畫史品列辨拙工
玉局散吏竒絕語百金難買碧璫瓏伐毛蛻骨
凌倒影超脫形似誰能省灑然如濯淒清涼酒

力能禁詩骨冷翠蛾魚貫螺蟠紆變態疊出書
之餘風流曾識晉衣冠如此此君何可無世氛
屏却無由迫清癖已成醫不得太乙藜火照瑯
玕太史籀篆鐫圭璧石牀淨洗秋霞眠鶴夢萬
里鷗波牽月明遠漢亂蒼雪日上扶桑消綠煙
故山別來徒想見官不負余余自厭借看日款
故人家縱橫熳爛披東絹爲歌韋侯風滿林舊
治猶存覆庇陰先生觀畫亦觀德真節堂堂虛
道心

題沈啓南畫吳德徵西溪別業圖

翁稱白石鬚眉白幻出西溪似灑西花竹村深
宜晦迹藤蘿屋小遂幽棲孤舟訪戴饒風雪近
局招陶候杖藜業付兒孫謝金紫發春東作看
扶犁

題文徵仲畫金焦落照圖

吳瑞

戲拈秃筆寫金焦萬里青天見玉標未用按圖
神已往耳邊似接海門潮
閒寫金焦鎮海門夕陽孤鷺淡江痕一枝畫筆
承傳久須信先生老可孫

余畫金焦落照圖吳水部德徵先生寄示

二詩題謝長句

文徵明

先名璧字徵明後以字行長洲人善屬文工詩書畫皆入妙品有重名以諸生計偕京師用薦為翰林待詔年九十終

憶昨浮船下揚子平翻渺渺波千里何來雙鳥
挾飛樓璀璨彤煌截濤起夕峯倒墮滿江陰霜
樹高浮半空紫舟人指點落日處凌亂煙光射
金綺平生快睹無此奇却恨歸帆北風駛至今
偉蹟在胸中回首登臨心不已偶然興落尺帟
間便欲平吞大江水固知心手不相能塗抹聊

當卧游耳晴窓舒卷十數回不敢示人聊自喜
水部先生詩有名忽寄瑤篇重稱美謾云家法
自湖州自媿區區何足齒由來題品係名聲何
况先生是詩史君不見當年畫馬曹將軍附名
甫集猶不死又不見閻公自謂起文儒池上時
蒙畫師耻人生固有幸不幸拙劣何堪古人擬
江山千載等陳迹一笑寧須論非是

題友壻王世寶鈎勒竹

世寶崑山人

湘竿淚歇斑不留縞衣玉立清而虬蕭蕭寒月
照空影冉冉白雲生素秋誰家美人誇雪面中

庭搖珮清霜愁飛來白鳳何所有玉羽瑟瑟風
颼颼古來畫竹誰最優先宋彭城元薊丘誰翻
新格作鈎勒王君一派真其儔稍從筆底超變
相遂能意外資窮搜應以虚心本性在不使粉
節緇塵浮清陰雖改風骨是意足肯於形迹求
竒蹤豈出漢飛白古意尚有唐雙鈎昔人論書
謂心畫看君畫筆知清修我方有愧文與可君
已真如王子猷高堂對此心悠悠聊書數語遙
相投慙慙報我無多謀雙竹不讓雙瓊球

余爲黃應龍先生作小畫久而未詩黃旣

自題其端復徵拙作謾賦數語畫作於
弘治丙辰詎今正德辛未十有六年矣
尺楮回看十六年殘丹剝粉故依然得君品裁
知應重顧我聰明不及前小艇沿流吟落日碧
山浮玉漲晴煙詩中真境何容贅聊續當年未
了緣

題黃應龍所藏巨然廬山圖

筠陽文學倦官職十年歸來四壁立探囊大笑
得片紙不啻瓊球加拾襲攜來示我俾品評謂
是名僧巨然筆渙蹟漓蹤那辨真白間雙印還

堪識古篆依稀贛州字元宋流傳非一日要知
源委出珎葳未論誰何定名蹟墨渝紙敝神自
存老筆鱗皴况超逸岡巒迤邐蒙密樹浦溆縈
紆帶村室盤盤細路繞山椒斜引魚梁更東出
途窮山盡得幽居穹宮傑構臨清渠仙邪佛邪
定何處髣髴勝境如匡廬還從文學問何如大
笑謂我言非虛自言遠游真不俗曾見廬山真
面目五老之峯披白袍玉虹萬丈時飛瀑某壑
某丘皆舊游展卷晴牕眼猶熟祇今老倦到無
由對此時時作卧游慚余裹足不出戶聞君此

語心悠悠高懷只尺已千里眼中殊覺欠扁舟

為孫叔英題崑野清趣

沈訥訥字文敏崑山人正統間以進士授大理評事累官至福建按察副

使為文貴出已意聲望屹然所著有兔園遺稿下里餘音

幽人築室傍巖阿得趣其如此地何慢捲微雲
秋水迴屏開銀月夜涼多澱湖潮落浮蒼峙崑
阜山明映碧螺我欲携琴遠相訪一樽期與醉
煙蘿

題張翬贈畫

沈魯魯字誠學崑山人宣德間應試應天以被髮跣足為耻即棄去不復

應舉益肆志博覽刻意古學凡邑解及士大夫銘誌多出其手巡撫周忱下車問政太守况鍾贈之金力辭不受制行潔清所著有經制權畧等書若干

湖天渺渺山重重日月出沒為西東西東南北
千萬頃鏡面一碧涵青空中有松雲出榆火居
人指是蓮花朶四面風濤自漲天穩坐其中奈
何我墾田不辭筋力竭種得秋成免糠粃扁舟
一葉蒲帆輕只載清風與明月清風飄飄吹我
衣明月皎皎照我歸文鶴造集兢成務冥鴻自
向天邊飛千卷書可讀終老尤未足一曲琴可

聽心清亦忘形富貴功名滿人耳萬事悠悠何
足齒天倫大義不可虧教養兒孫要知此

崑山雜詠卷第十三

崑山雜詠卷第十四

時政

崑山初秋觀稼回縣署與同寮及示姑蘇

幕府

張方平

邑民三萬家四邊湖海遠家家勤穡事市井商
游少荐歲逢水沴饑勞何擾擾我來忝撫字見
此心如搗去秋僅有年高田僅停潦今幸風雨
調皆話天時好春喜鵲巢低夏更蟬聲早吳民
候旱勞秧船拏參差一作拏船葑岸縈迴繚藝

插暮更急車聲轉清曉紡筥猶掛壁何暇張魚
鳥我時行近郊小艇穿萍藻渚長葭蕪深野沃
耜耜倒孺子遠餉歸閒暇顏色飽預喜省敲筥
租賦可時了歸來軒館靜曠蕩盈懷抱衙退人
吏散庭廡閒窈窕露蓀映孤亭風荷動幽沼置
身木雁間茲焉顛終老顛蹶走榮利况余拙非
巧鱸膾飯紫芒鵝脂酒清醪紫芒鵝脂稻名悵然懷友
生虛齋爲誰掃

費侯興學詩

費侯名復初字克明壽張人
至正間爲崑山知州剛直廉
明時州治初復學宮久廢咸爲拓闢
改築暇則與諸生講求義理汲汲不

倦

袁華

崑山州廟學唐縣令王綱所建記之
者安定梁肅也五季之末廢于兵宋
知縣邊倣始克復修記之者太原王
禹偁也政和迄宋季重修者屢矣國
朝元貞元年陞縣爲州置博士弟子
員延祐初遷治太倉而廟學亦廢越
四十有三載張氏入吳以州治瀕海
江無以盛民而固圉也復歸舊邑今

守東平費侯復初下車首謁廟學憮
然而歎曰學校者教化之本也蓋不
可一日忽踰年政成民信廼出其廩
稍之贏新作戟門及倫堂撤禮殿之
舊而加崇廣焉作齋廡以居學徒則
又民之輸材而爲助者嗚呼若費侯
者其可謂知所本矣詩曰維桑與梓
必恭敬止况學校乎華也忝職郡庠
沐賢侯之教養覩茲輪奐實重依歸
廼歷考廟學之廢興爲詩一章以美

之詩曰

肇自婁校王令綱作五季披攘鞠爲叢薄火德
阜隆芟除苛虐久鬱而信聖道孔炤蕞爾吳越
旣入王畧繫邊倣氏聿來主學庀材儻功不日
而落歷宋祀三百執事有恪於赫皇元龍飛朔
漠詔陞縣爲州建官錫爵置博士員以訓以飭
治遷於東民實新邑廟隨所在茲實榛棘歲在
實沉海鈔梗逆復歸舊治邑廬如昨明明費侯
英傑卓犖旣牧我婁民復膳我城郭漸摩煦嫗
民瘡無瘼舍菜在泮考藝問業眷茲頽圯心焉

休惕相方眎趾爰究爰度采石于山斬木于壑
工師子來乃礮乃斲乃表修垣重門有覺外象
靈星內列畫戟中嚴禮殿既崇且碩鳳麗于甍
龍攫其角言言齋廡左右翼若橫經有堂釋奠
有樂多士遊歌有館有館有穀費侯戾止在泮獻酌
冠弁侏侏不笑不譎顧瞻基構昔痺今擴不有
君子其何能益嗟吁諸生夙蒙啓迪爰止其所
涵泳朝夕服我聖訓伊侯之德顛候壽考如金
如石懋繼前修永永無斁


奏保芮知縣芮洪武中進士為崑山令首擢

諸散蠹及舊有催糧官校久事邑中
輒籍官屋為牢禁里甲輦淹久多死
狎悉解遣仍奏劾官旗娶婦生子於
邑者上命御史李嶽究治械送京
師凡二百餘人永樂元年坐事發遵
化炒鐵耆老伏闕懇奏詔遣馳傳還
任後復奏除荒糧開濬吳淞江民甚
利之未幾陝西按察僉事馬祥薦狎
才堪治劇再還崑山狎為人雅正寬
平務存大體在邑善績莫可殫記

范能

野老龍鍾白髮新陳情直欲到楓宸婁東最是
思何武河內重聞借寇恂華蓋當頭朝紫闕青
鞋隨步踏紅塵欽惟 聖主垂恩澤早賜東還
福我民

崑山雜詠卷第十四



周可
尹順
寫刻

